

В НЕДЕЛЮ 4-Я СЕДМИЦЫ ВЕЧЕРА,

по предначинательном псалме

На Господи возвах, поставим стихов 10. И поем стихиры умиленные:
Осмогласника 4, и трипеснца подобны господина Иосифа. Глас 3.

Подобен: Велия Креста:

Великия вернии во время покажем воздержания труды: * яко да славу великую получим, * милостию великаго Бога * избавляеми пламене геенскаго.

Время пощения ныне преполовивше, * начало божественнаго жития яве покажем, * и в конец добродетельнаго жительства достигнути тепле потщимся: * яко да примем сладость нестареемую.

Иный господина Феодора. Глас 7.

Подобен: Под кров Твой:

Преполовивше сей священный пощения путь, * к будущему радостию потеем, * благотворения елеем души помазавше, * яко да сподобимся Христа Бога нашего, * и Божественным стражем поклониться, * предварити и страшное и святое * Воскресение.

И Минеи 3. Слава, и ныне, Богородичен. Вход.

Прокимен глас 8ми: Не отврати лица твоего от отрока твоего, яко скорблю, скоро услыши мя: * вонми души моей, и избави ю.

Стих: Спасение твое боже да примет мя.

Стих: Да узрят нищии, и возвеселятся.

Стих: Взыщите бога, и жива будет душа ваша.

И паки высочайшим гласом: Не отврати лица твоего от отрока твоего, яко скорблю, скоро услыши мя

И паки: Вонми души моей, и избави ю.

На стиховне самогласен дне. Глас 7:

Виноград насадивый, и делатели призывавый, * близ есть Спас: * приидите пощения подвижницы мзду восприимем, * яко богат есть давец и милостив: * мало делавше, примем душевную милость.

Ин самогласен. Глас 6:

В разбойническия помыслы впад Адам, * прельстися умом, и уязвився душею, * лежаше наг заступления: * ни священник же прежде закона внят ему, * ниже левит по законе воззрев нань: * токмо Ты пришедый Боже, * не от Самарии, * но от Богородицы: * Господи слава Тебе.

Мученичен: Мученицы Твои Господи, * не отвергошася Тебе, * ни отступиша от заповедей Твоих: * тех молитвами помилуй нас.

Слава, и ныне, Богородичен, глас 6:

Архангельски воспоем вернии * небесный чертог, * и дверь запечатанну воистинну. * Радуйся, Еяже ради отрасли нам Спас всех Христос, * Жизнодавец и Бог: * низложи Владычице мучители, * безбожнныя враги наша, * рукою Твоею Пречистая, * упование христиан.

И прочее последование по обычаю.
На Повечерии поем службу прилучившагося святого, в четверток Великаго
канона.

В ПОНЕДЕЛЬНИК 5-Я СЕДМИЦЫ

НА УТРЕНИ

ТРОИЧНЫ СЛУЧИВШАГОСЯ ГЛАСА.

По 1-м стихословии поем седальны умилительныя, Осмогласника два, с Богородичным.

По 2-м же стихословии седален господина Иосифа. Глас 3.

Подобен: Красоте девства:

Краснейшее время наста, достохвальный день * возсия воздержания братие, * потщимся очиститися, * яко да явимся чисти Сотворшему, * и красоту Его получим, * молитвами Того родившия, * единыя Чистыя Богоматере.

Слава, тойже.

И ныне, Богородичен:

Красоте девства Твоего, * и пресветлой чистоте Твоей Гавриил удивився, * вопияше Ти Богородице: * кую Ти похвалу принесу достойную? * что же возыменую Тя? * недоумеваю, и ужасаюся. * Темже яко повелен бых, вопию Ти: * радуйся Благодатная.

По 3-м стихословии седален господина Феодора. Глас 7.

Подобен: Господи, мы есмы:

Господи, давый нам предварити днешний день, * седмицу святую предсияющую светло, * Лазарево от мертвых востание страшное, * сподоби рабы Твоя страхом Твоим преити * поприще пощения все совершающия. [Дважды.]

Богородичен: Честнейшая преславных херувимов еси * Всечистая Дево: * они бо Божественныя не терпяще силы, * крилами покрывше лица, службу совершают: * Ты же воплощенна Слова, * самозрительно видящи носиши: * Егоже непрестанно моли о душах наших.

Канон в Минеи, и трипеснец господина Иосифа: и стихословится песнь. Глас 3.

Песнь 1.

Ирмос: Воды древле, * манием Божественным, * во едино сонмище совокупивый, * и разделивый море израильтеским людем, * Сей Бог наш, Препрославлен есть: * Тому Единому поим, яко прославися.

Наша помышления божественным ралом возделавше божественнаго пощения, добродетелей клас плодопринесем, яко да не взалчем во веки, наслаждающеся сладостию неизживаемою радующеся.

Многолетныя страсти внутрь ношу, омрачающия окаянную душу мою, к Твоей безлетне Слове, безначальнаго Отца силе непобедимей, сокрушенным сердцем припадаю и молюся: ущедри, и спаси мя.

Доброе пощение питает сердца, умащающее помышления богоугодная, и страстей бездну изсушающее, тучами умиления очищает, верою хвалу приносящих Вседержителю.

Богородичен: Многоименитая Отроковице, радуйся святая Дево, Богородительнице Марие, верных похвало, клятвы избавление, лестнице небесная, недомысленное чудо, купино неопалимая, земле неделанная.

Иный господина Феодора, глас 7.

Ирмос: Поим Господеви, * погрузившему всю силу фараонову в мори, * победную песнь, * яко прославися.

Живоносному Древу поклонившися, отсюда идем путем пощения к страсти Христовой радующися.

Христу последующе, отвержемся мира, и воздем крест на рамо, соображающися Его Божественным страдем.

Троицен: В трех Лицах, пресущное едино Божество, воспоем вси Отца, и Сына, и Святаго Духа.

Богородичен: Егоже родила еси недомысленно, тления не разумевши Чистая, Иисуса Спаса умилостиви ныне о рабех Твоих.

Слава Тебе Боже наш, слава Тебе.

Егда в славе приидеши со ангелы, судити всяческим, добрый ответ дати Тебе Христе, нас сподоби.

Катавасия: Поим Господеви, * погрузившему всю силу фараонову в мори, * победную песнь, * яко прославися.

Песнь 8.

Ирмос: Вавилонская печь отроки не опали, * ниже Божества огонь Деву растли. * Тем со отроки вернии возопиим: * благословите дела Господня Господа.

Вредными змия прелестьми извлечимъ, и прельщаемъ умом по вся дни, язве моей прилагая язву, Спасе зову Ти: врачу болящих, обрати и спаси мя.

Постився воскреси отроча Соманитиды древле, укрепляемъ Елисей яве Духом: мы же умертвившися сладострастием, живоносным постом вернии оживимся.

Ниневитяны спасл еси Господи Человеколюбче, древле покаявшися, в плачи и посте, яко благоутробен: нас же милостию Твоею ущедри, недоумеющих дела исповедатися Тебе.

Богородичен: По рождестве нетленно пребывшая Всенепорочная, избави, молимся Чистая, от тли рабы Твоя, верно поющия единомышлением души: благословите дела Господня Господа.

Иный.

Ирмос: Страшнаго * херувимом, и чуднаго серафимом, * и миру Творца, священницы, * и раби, и дуси праведных, * пойте, * благословите, и превозносите Его во веки.

Воздержания с Богом крепость имуще вернии, прочее юношески тещем святое поприще, и венцы приимем.

Безплодие зря многоболезненныя моя души, еще потерпи Христе, и не посецы мене, якоже смоковницу оную проклятую.

Благословим Отца, и Сына, и Святаго Духа, Господа.

Троицен: Единоначальная Троице, и Триипостасная Единице, Отче, Сыне и Душе, от всяких избави искушений и бед Тя воспевающия.

Богородичен: Радуйся, горо Божия: радуйся, присносветлая свеще: радуйся, новое небо: радуйся, уме блистайся: радуйся, храме Господень: радуйся Всепетая.

Слава Тебе Боже наш, слава Тебе.

Страшное Твое испытание помышляя Христе, ужасаюся, трепещу, и вопию: неизмерную имеяй велию милость, спаси мя окаяннаго.

Хвалим, благословим, покланяемся Господеви, поюще и превозносяще во вся веки.

Ирмос: Страшнаго * херувимом, и чуднаго серафимом, * и миру Творца, священницы, * и раби, и дуси праведных, * пойте, * благословите, и превозносите Его во веки.

Песнь 9.

Ирмос: Новое чудо и боголепное: * Девическую бо дверь затвореную * яве проходит Господь, наг во входе, * и плотоносец явися во исходе Бог, * и пребывает Дверь затворена. * Сию неизреченно яко Богоматерь величаем.

Чашу божественную исполнивши ныне умиления, постная благодать яве, созывает вся верныя, вопиющи с веселием: приидите, насладитесь, пиянство страстей отложивше, да будущаго сподобитесь утешения.

Близ суд, внемли душе, совестию попецйся, и делай добре, тебе неосуждену присно соблюдающая: аще бо себе зде разсуждаем, никакоже тамо осудимся без свидетелей, идеже повиннии осуждаются.

Начала, силы, престолы, серафими, господства, и власти, и херувими, ангели, архангели, Бога молите, пощения время прейти нам, Сему угодная творящим, да яко раби благоугодившии славу получим.

Богородичен: С мученики, с пророки, Рождшую Тя, с преподобными всеми Христе молящуюся прими присно, о рабех прогневавших Тя, единаго Человеколюбца Владыку, Егоже небеснии чинове трепещут.

Иный.

Ирмос: Паче естества * Матерь, и по естеству Деву, * едину в женах * благословенную, * песньми вернии * Богородицу величаем.

Тихое плавание пощения, духовным дыханием преплывше, ко пристанищу страстей Христовых, достигнути помолимся.

Хананей поревновав, помилуй мя вопию Ти, Сыне Давидов Боже, и исцели мою изнемогшую душу, якоже она я дочь.

Троицен: Божества Естество, единствующее Единицу, и начертаньми тремя тройствующее, Отца, и Сына, и Духа воспоем.

Богородичен: Во чреве заченняя непостижимаго Слова, и Сего без семене плоти рождающая, моли прилежно спастися душам нашим.

Слава Тебе Боже наш, слава Тебе.

Оправдавый мытаря, очисти мя вопиюща: и мне грешному милостив буди, всех Судие, прощая моя согрешения.

Ирмос: Паче естества * Матерь, и по естеству Деву, * едину в женах * благословенную, * песньми вернии * Богородицу величаем.

Светилен гласа.

На стиховне самогласен, дважды. Глас 8:

Впадшему в разбойники уподобихся аз, * Владыко всех прегрешеньми моими упад, * и от них немилостивно уязвихся: * но не остави мене неисцельна, не от Самарии, * но от Пречистыя Девы пришедый, * Иисусе спасительное имя, * помилуй мя.

Стих: Исполнимся завтра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Впадшему в разбойники уподобихся аз, * Владыко всех прегрешеньми моими упад, * и от них немилостивно уязвихся: * но не остави мене неисцельна, не от Самарии, * но от Пречистыя Девы пришедый, * Иисусе спасительное имя, * помилуй мя.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: **Ч**то вы наречем святии? * херувимы ли? * яко на вас почил есть Христос. * Серафимы ли? яко непрестанно прослависте его. * Ангелы ли? тела бо отвратистеся. * Силы ли? действуете бо чудесы. * Многая ваща имена, и большая дарования: * молитесь спастися душам нашим.

Слава, и ныне, Богородичен:

Небесная поют Тя, обрадованная Мати Безневестная, * и мы славословим неизследованное Твое Рождество Богородице, * моли спастися душам нашим.

НА 6-М ЧАСЕ

Тропарь Пророчества. Глас 3:

Яко беззакония наша восташа на ны, * воскресни Господи помози нам: * Ты бо еси Отец наш, * кроме бо Тебе иного не знаем.

Прокимен, псалом 83, глас 4: Олтари Твоя Господи сил, Царю мой, и Боже мой.

Стих: Коль возлюбленна селения Твоя Господи сил.

Пророчества Исаиина чтение. [Глава 37, ст. 33 – 38. Глава 38, ст. 1 – 6.]

Тако глаголет Господь на царя Ассирийска: не внидет в сей град, ниже пустит нань стрелу, ниже возложит нань щита, ниже оградит окрест его ограждения: Но путем, имже прииде, темже возвратится, и в град сей не внидет. сия глаголет Господь: Защищу град сей, еже спасти его Мене ради, и ради Давида раба Моего. И изыде ангел Господень, и изби от полка Ассирийска сто осмьдесят пять тысящ: и воставше заутра, обретоша вся телеса мертва. И отыде возвращься Сеннахирим царь Ассирийский, и вселися в Ниневии: И внегда поклонятися ему в дому Насараху отечествоначальнику своему, Адрамелех и Сарасар сынове его убиша его мечми, сами же убежаша во Армению, и воцарися Асордан сын его вместо его. Бысть же в то время, разболеся Езекиа до смерти, и прииде к нему Исаиа пророк сын Амосов, и рече к нему: сия глаголет Господь, устрой о дому твоём, умираеши бо ты, и не будеши жив. И обрати Езекиа лице свое к стене, и помолися к Господеву, глаголя: Помяни Господи, како ходих пред Тобою со истинною, и сердцем истинным, и угодная пред Тобою сотворих, и плакася Езекиа плачем великим. И бысть слово Господне ко Исаии глаголя: Иди, и рцы Езекии: тако глаголет Господь Бог Давида отца твоего: услышах молитву твою, и видех слезы твоя, се прилагаю к летом твоим, лет пятнадцать. И от руки царя Ассирийска избавлю тя, и град сей, и защищу о граде сем.

Прокимен, псалом 84, глас 8: Яви нам Господи милость Твою, и спасение Твое даждь нам.

Стих: Благоволил еси Господи землю Твою, возвратил еси плен Иаковль.

Понеже должно есть ведати о кафисмах четвертка Великаго канона, яже суть три, яко да прочтутся прежде, и не оставятся, зри наперед, и якоже расположены суть на своих им местех, сице чти.